

कुंडुख कथा नू पुरखा कथपण्डी गही महबा

हेमन्त कुमार टोप्पो

शोधार्थी

जनजातीय एवं क्षेत्रीय भाषा विभाग
राँची विश्वविद्यालय, राँची

कुंडुख कथा नू पुरखा कथपण्डी गही अकय महबा रई। इंदितिम नम्हय उरमी किसिम गही नेत नेग, धरम-करम, नलख द्यतम, नेगचार, बरनिका (इतिहास) गुटठी अखतारई। कुंडुख कथा पुरखा पथपण्डी तिम कमरकी रई, अरा कथपण्डी कुंडुख कथा तिम बनचकी रई। एडो गही नता अकय गड्डी रई। कथा कच्छनखरनुम-2 कथपण्डी इदातो बकलूरिया बनचा केरा कथपण्डी ती कथा मलता भखा दव अरा बड़ियर मंजा केरा।

कुंडुख कथपण्डीन अखना ती मुंध नमागे 'पुरखा बक गही माने बुझुरना चाड़ रई। पुरखा आल बआ खने एन्ने पच्चा आलर एका ओत्तर इन्ना मल्लर इदातो पचबालर। प्रसन्नमुख उरांव पुथी पृष्ठ-30 नू बोनिफास तिकीस पचबालर गही पत नू बाचका रअदस "केवल वे ही जो सफल पारिवारिक जीवन व्यतीत करने के बाद प्राकृतिक ढंग से मृत्यु को प्राप्त होते हैं पचबालर या पूर्वज प्रतिष्ठा के पात्र होते हैं।" पुरखा परिया बआ खने थाह मनी का पचबालर गही परिया मलता बेड़ा। ई लेखआ पुरखा कथपण्डी गही माने मंजा पचबालर गही दव-दव लिंगका कथा। ई लेखआ पुरखा कथपण्डी आलर गही जिया ती उरूखका एन्ने दव कथा तली एकदा सहजेम अरा तान-तानिम बई ती उरखी काली। एन्ने कथा ओन्टे बई ती नन्ना बई मन्नुम पीठी दर पीठी परदनुम काली। एन्ने कथपण्डी गही टूडस मलता कमउस एकअम ओन्टे आलस का आली माल रई पहे ईद सबसे खोडहा गही खुरजी मनी काली। भले इदिन एकअम ओन्टे आलस दिम बाचका मलता टूडका रअदस पहे ईद खोडहा गही खुरजी दिम मनी।

कुंडुख पुरखा कथपण्डी नू नेत-नेग, धरम-करम, नलख-घतम, ओन्ना-मोखना, उज्जना-विज्जना गही संगे-संगे सामाजिक अरा राजनीतिक उज्जना गही छपा ईथरई, इदातो पुरखा कथपण्डी तो मुद्ध रूपे नू जिया ती उरूखका दव कथा दिम रई। एडपा पली ता उज्जना-विज्जना नू नता गुट्टी ही हू झलक कथपण्डी नू इथरई। इबड़ा गुट्टी बिहइतन एर नाम बआ आंगदत्त का पुरखा कथपण्डी नम्हय खोडहा अरा साधारण आलर गही उज्जना घी ओन्टे परकला तली। प्रसन्नमुख उरांव नामे पुथी पृष्ठ-39 नू बोनिफास तिकीस इदि गही पत्त नू बाचका रअदस का उरांव सहज और निश्चित प्रकृति का होता है परन्तु जीवन का मूल्य वह अच्छी तरह समझता है वह कोई दुस्साहसी काम कभी क्यों न करे चौकस रहा करता है। कहावत है डहरे एकोय होले संगे-संगे एक्के, एकसआनिम ओककोय होले कप्प-एरके की ओक्कके, नन्नर गुइया कालोय होले चिहुटती रअके।" ई लेखआ कुंडुख कथपण्डी ओन्टा एन्ने आलो तली एकदा मेरखा मइया ती खतरई अरा खेलेल ता घांसी लेखआ कुंदी अरा परदी, ईद तंगआ पहटा ता अम्म अरा खज्ज वेसे एमबा अरा दव महकन चिई।

पुरखा कथपण्डी गही बिहइत -

1. पुरखा कथपण्डी आलर गही जिया ती सहजेम अरा अचकम उरूखका बई ता कथा तली।
2. ईद भरसक टूडका मल रई अरा ओन्टे बई ती नन्ना बई मन्ने परदनुम काली।
3. एन्ने दव कथा गही टूडस मलता बऊस गही थाह मल मनी।
4. एन्ने कथा खोडहा गही नेत-नेग गही आएना बेसे मनी।

5. एन्ने कथा बअना अरा मेनना नू अकय दव लग्गी।
6. पुरखा कथपण्डी आलर गही पत्तआना, नेगचार, परब-तिहार, नलख, धंधा ती होतारई।
7. एन्ने कथा नू कथआइन अरा विज्ञान गही महबा माल र-ई।
8. कुंडुख पुरखा कथपण्डी प्रकृति इदातो नम्हय हेदे ता ताका फुली अरा खोडहा गही नलखन दहदर ननी।

अक्कु इदिन नाम जुदा-जुदा ननर ठअकम बुझुरओत ।

1. पुरखा खीरी गही रूपे नू -

नम्हय कुंडुख खोडहा नू ढेर पच्चा-पच्चा खीरी रई एकदन नाम कथपण्डी गही रूपे नू टूडा-बचआ अरा अखआ लगदत्ता। "करमा-धरमा नामे पुरखा खीरी रई एकदन नाम करम परब गही बेड़ा नू मेंदत्ता। ई खीरी नामन दव डहरेन इदई। दव नलख ननोत होले नमागे दव खंजपा खक्खरोओ मलदव ननोत होले मलदव मनो। एन्नेम अहलाद तिकीस गही टूडका पुथी पृष्ठ-9 " कुंडुख पुरखा खीरी" पुथी नू खीरी रई चन्दो अरा बीडी गही खीरी। ई खीरी नू लिंगका रई का बगे हेडेम-जेडेम मन्ना ती उन्दल चीखना मनी। चन्दो अरा बीडी सहिया जोड़ोरका रअनरा खुबेम हेडेम जेडेम मना लगियर। उन्दल एने अकलक मनी का अउला ती एडो झनर दोकहर मंजर केरर अरा इन्ना गूटी एडो झनर ओन्द संगेम मल रअनरा।

"कुंडुख कथपण्डी अरा खीरी" पुथीनू एडमंड टोप्पोस खीरी खुजका रअदस। अन्नु असुरर अरा लोधरर" नामे खीरी नू आर धरमेस गही कथन अरा पेसकन मल मेन्नर अरा आर गही जिया चाइल काली। धरमेस गही पेसकन मंजका होले आर बछरोओर कालोर पहकन। एन्नेम कएनो पुरखा खीरी रई एकदा नमन इन्ना ता उल्ला नू हु दव डहरेन एदना गही नलख ननी।

2. पुरखा डण्डी गही रूपे नू -

नम्हय कुंडुख कथा नू ढेर बगे पुरखा डण्डी रई एकदा नमन तंगआ नेत -नेग धरम-करम, बरनिका (इतिहास) गुट्टी तिगी।

कथसोर पुथी नू पंडित आयता उरांवस गही टूडका डण्डी रई - अना अदी मुंजुरना मलका, निनिम घरमे रअदय बंगायो-2, उरमीनिम एरा लगदय, उरमीगेम जोड़गर रअदय कोड़ा-कोडा रअदय बंगायो-2

व्याख्या :-ई डण्डी नू धरमेसिन धइन बाचका रई अरा आस ती गोहाररका रई, एन्देगे का धरमेसिम उरमीन कमचस अरा एरा-खोजा, परदआ लगदस, डण्डी नू धरमेस ती पत्तआनन (विश्वास अरा आस्था) एदाचका रई। " प्रसन्नमुख उरांव पुथी पृष्ठ-45 नू बोनिफास तिकीस ओण्टे डण्डी टूडका रअदस "भइया वहिन उरखर कोय, सिरा-सिता नाले नू) रहचर केकडो लाता एडपा कोय, सिरा सिता नालेनू रहचर ॥

कुंडुख पुरखा कथपण्डी" पुथी पृष्ठ-11 नू डी० नारायण भगतस एड्ता खंदहा नू पाइका रअदस -

धुमकुडिया जोख एडपा मना लगिया, जोख एडपा लूरकुडिया मना 3 लगिया ॥

कथपण्डी नू तिगका रई का धुमकुडिया नम्हय कुंडुख खोडहा ता अकय महवा जोगे अड्डा तली एका अइया जोखर-पल्लर लूर-अंकिल खक्खनरा।

3. लीला (नाटक) गही रूपे नू -

अन्नेगा लीला गही कुन्दरना गही पत्त नू कुडुख कत्था नू बग्गे थाह मल मनी, पहें, एकअम विशेष बेडा नू परब-तिहार, बेजा-कार्ज नू इदिन एरागे खक्खरिई। बेडा आलारिन अलेखतआगे मलता रिझावआगे लीला ननतारई। आल बेजा नू मुक्कर बरात बिदा मनो बीरी छया भया मन्नर मलता जाँखर पेल्लो बनअर छया भया मन्नर इबडा गुडडी लीला गही नमद तली। कुडुख खोडहा नू अरखी झरा अरा अंधविश्वास गुट्टी बग्गेम मनी। इदिन नकल ननर लीला नही रूपे नू बेडा सिरे एदतारई। "अयंग जिया" नाटक पुथी नू पियस लकडास ओण्टे कुडुख एडपा नू निशा अम्म गही करने एडपा बिगडारना अरा अयंग गही दव धोख अरा सहना-लहना ती एडपा बनई अदिन एदाचका रई।

4. सन्नी-सन्नी, छितरारका कत्था गही रूपे नू -

नम्हय पुरखर कत्था-कत्था नू एन्ने सन्नी-सन्नी मुंदा दव-दव कत्थन बनअर चिअनर एकदा सवसे खोडहा गे दव अरा मानी महबन तिंगी। एन्नेम कहुता मलता बंको कत्था, बई-तुरा, बुझवइल, खद् बेचना गही रूपे नू अखआ ओंगदत।

"कुडुख कत्थआइन अरा कत्थटूड" पुथी पृष्ठ-51 नू चौठी अरा महावीर उराव गर टूडका रअनर-कुदोय होले बेदोय,

ओककोय होले खक्खोय

इतू लिंगका रई का एकअम लुरन सिखरआगे अरा धरआगे बेडा चिअना अकय चाड मनी। कुदोत होले बेदोत, ओककोत तबेम खक्खोता ईद-गा मानी कत्था तली लूर खकारना अड्डा नू काना मनो अरा असन ओक्कना मनो होलेम लुरगर मना ओंगदत।

कुडुख बुझरनखरना बुईतुरा अरा बंको कत्था' पुथी पृष्ठ-63 नू इन्द्रजीत उरावबस ढेर बग्गे कहुतन, बैको कत्थन, बई-तुरा अरा बुझरनखरनान खोड्चका रअदसा।

"दव नलखतिम दव खंजपा खक्करिई"

दव नलख ननोत, मेहनइत ननोत होले नमागे दव खंजपा खक्खरोओ दिमा खोडहा गे एन्ने कत्था अकय महबा उइयी।

कडमा एसरना

ईद ओन्टे बई तुरा तली इदि गही माने मनी तबाह मन्ना। एकअम कत्थन सोझे मल बअर घुमावअर बअना मनी पहें एकअम आलर चाडेम बुझरनर कानर।

"खेन्न एखना" इदि गही माने मनी सथारना। खेन्न ओन्टे नम्हय देह ता एन्ने अंग तली एकदन मुच्चे मलता मिंखे होलेम सथारका बेसे लग्गी। अंबगे आराम नन्नन का सथारना खेन्न एखना अबलर एन्नेम कएनो बुई-तुरी रई एकदा नम्हय कुंङुख कत्थन दव कमई, इदिन नाम पुरखा कत्थपण्डी गही रूपे नू हूं अखदत।

"कुडुख कत्थआइन अरा कत्थटूड" अरा कुडुख बुझरनखरना, बुईतुरा अरा बंको कत्था' पुथी नू बुझवाइल हूं दूर बागे टूडका रई एकदन नम्हय पुरखर बेडा-बेडा नू बाचका रहचर- अदाकेरा इदा बरचा

इदि गही माने मनी नजइरा नजइर ओन्टे एन्ने आलो तली एकदा तुरथेम इसानिम रई अरा तुरथेम गेच्छम चइल काली इदिनिम बनअर अदा केरा इदा बरचा। अखडा नू का एकअम पिण्डा नू ओककर आलर एंड खोडहा नू मनर बुझरनखरनान बाच नखरनर। इदि ती मुद्दो गही कसरत मनी दिव संगे संगे कत्था बाच नखरना ती पुना पुना बक बरई। आलर गही लूर अकिल मन्ना गही थाह मनी। इंद हूं नम्हय कुंङुख कत्थन परदआना नू अजम संगे चिई।

"कुट्टका चोड्डो खेखलन तुरई"

इदी गही माने उसांगी तली। गोहला उयागे अरा नगद उगतन खुपटआगे उसांगी घी चाड मनी अरा अदिन / गरम ननर की धारे कमना मनी होले

नगद खुपई चोड्डेन कुडा खने गा खिई काली पहें एकासे खेखलन तुरई। इदिन बुझरआगे एन्ने कत्था बाचका रई। एन्ने कत्था लूर बुद्धिन बढाबई संगे-संगे आलर गही जियन थिराबई इदिन नाम मनोरजन नन्ना बआ ओंगदन्त।

एन्नेम पुरखा कत्थपण्डी नू खद् बेचना मलता बेचतआना डण्डी गुठी हूं रई। इदिन इयया ईगे जूदा टी तेंगतारई का इदि गही विशेष रागे मल्ला। एकअम साहे डण्डी संगे इदि गही रागे मल जुतरई।

बिण्डो बीसागे संगे चिआ ददा संगे चिआ

डहरे नू लकडा रई ददा कडा रई।

खद्दर गही ई डण्डी भले बेचना तली. मुंदा ई खोडहा गे दव कत्थन तिंगी। ओन्टे सन्नी कुक्कोय खद् तंग ददस ती गोहरारई का एंगागे पेठ बिण्डो बीसागे काना रई। डहरे नू अंज खंज टोडग परता रई, अइया लकडा घी इलिचका रई। एंगन संगे चिआ होले दव कुना कालोन बरओना। खेखेल ता ओरमा आलर गे एक दसरर गही सहाडा गही चाड मनी एकअम मला एकअम उल्ला, एकसआनिम हूं चाड मनी दिमा सहाडा होअना अरा सहाडा चिअना अकय चाड रई।

एन्नेम कुंङुख पुरखा कत्थपण्डी नू ढेर बग्गे दव दव कत्था रई एकदा नम्हें कुंङुख कत्थन नगद कमआ लगी अरा दहदर नना लगी। अंबगे कत्थन/भाखन परदआगे पुरखा कत्थपण्डी इदातो पचबालर गही तिंका मलता बाचका कत्था चाहे आद एकअम रूपे नू रई, आदि गही अकय चाड रई। इदिन बुझरना, अखना अरा तंगआ बोलचाल नू व्यवहार नू ओन्दोरना अकय चाड रई, होलेम नम्हय खोडहा परदो, भखा परदो, कत्थपण्डी परदो अरा नाम हूं परदोत।
